

Por spera 25 Tumbero y 9 Banda pa e di 47 Festival di Tumba Aruba

DIARANSON tabata e dia pa inscripcion pa e di 47 Festival di Tumba Aruba. Comision di Tumba, bou encargo di Maestro sr. Robert Jeand'or, a spera tur esnan cla pa competi pa e corona entre 6'or cu 9'or di anochi na oficina di SMAC.

For di trempan por a mira varios stacion di radio ta set up p'asina por transmiti for di 6'or en punto pa mira e prome participantenan yega pa inscribi.

E prome ora tabata relativamento keto, pero poco e Tumberonan conoci di nos isla a cuminsa yega p'asina oficialisa nan participacion na Festival di Tumba Aruba.

Tabata reina un dushi ambiente di colegialidad entre participantenan y medianan di comunicacion presente pa cubri tur esaki. SMAC y Comision di Tumba ta sumamente contento di por a ricibi nan tur pa algun ora den nan sede na Weststraat.

Sigur por sinti e fiebre di Aruba su Carnaval y esaki sigur a conta pa tur esan cu a inscribi ayera. Nan ta cla pa yuda nos engrandece e Festival di Tumba Aruba.

Un poco despues di 9'or di anochi, a anuncia e resultadonan, cu a nifica un total di 25 Tumba acompaña pa 9 diferente banda. Esaki ta un adelanto den cantidad di participacion compara cu aña pasa e tabata 17.

Comision di Tumba e expresa cu a keda hopi contento cu e cantidad di inscripcion y cu e ta un desaroyo positivo pa nan como Comision di Tumba y e Festival mes.

Festival di Tumba Aruba ta tuma luga na Aruba Entertainment Center riba diasabra 28 di januari. Ticket pa entrada, na balor di 25 florin, lo ta obtenibel for di dialuna en adelante na oficina di SMAC. Lo anuncia si lo tin mas punto di benta. SMAC y Comision di Tumba ta desea di mira un stadion yen di fanatico, amantenan di Tumba, gosando en bibo di e ritmonan pegahoso di Tumba. Bar y cushina semper ta bon surti.

Comision di Tumba ta publica e lista di inscripcion. Aki por mira number di tur participante y banda.